

<County: Yorkshire North Riding>

<Code: L1212>

<MS reference: Northallerton, North Yorkshire County Record Office, ZDS I 2/1 >

<Text: Agreement for re-enfeoffment>

This indenture tripartid Wytteneſ þat whare : Edmond Darell of
 Ces3ay . Sqwyer has enfeffed William Darell of Wyltshire . George of Etton~ William Wylleſtorp
 Sqwyer henr~<?> Wylleſthorp Clerk <ill><smudge></ill>
 Darell of Mowegreve . and Robert Crosse Sqwyers . in his maners of Ces3ay Eldmere Dalton~
 Thorkelby and Breddesworth wyth all þare appurtenances And in all his odyr landes tenementes
 rentes and
 seruic3 wyth all yer appurtenances ; Whilk þat he has in þe towens of Crakhall heton~ Middilton~
 Catton~ opon~ : swale and Thornton~ on þe More be-syde Allerton~ and in all odyr places in þe
 Counte of
 york . And more-ouere in all his landes and tenement3 Whilk þat he hase in þe Cite and Subarbes of
 york Neuer-þe-lesse it is my will þat þe ſaid feffes ſall reinfeffe me þe ſaid Edmond at
 what tym~ as J require þayme . in all þe forſaid Maners landes tenementes rent3 and seruices . Wyth
 all þer appurtenances or of parcell of þayme . of ſlyk aſtate als J require þayme of . And yf J dye
 to-fore
 þe refeffement to me be made þan~ J wyll þat þe forſaid infeffes . ſall infeff Jsabell my . wyff . for
 terme of here lyve . in ye forſaid Maners landes tenement3 rentes and ſeruices wyth all þer
 appurtenanc3
 in york and yorkſhyre . The Maner <ill><smudge></ill> Ces3ay and Broddesworth wyth þare
 appurtenanc3 and þe landes and tenement3 in heton~ wyth all þer appurtenanc3 only except ; Also J
 will þat þe ſaide .
 infeffes of þe ſaid Maneres of Ces3ay and Breddesworth and all þe landes and tenement3 in heton~
 wyth all þer appurtenances and of reuerſion~ ſall trewly pay my dettes and Marye and help~ my
 Childer
 and meke a-gree fo3 my trespases to all þo þat J haue trespased to and do for my ſaule be þare
 dyscrecions And þen~ all þis fulfilled J will þat þe ſaid feffes ſall enfeffe þe next heyer~ of .^[me]
 Who es .
 euer itt happyn~ to be in all þe forſaid Maners . landes tenement3 rent3 and ſeruic3 Wyth all þer
 appourtenanc3 And also J will þat þe forſaid feffes ſall pay to Jonet þe wyfe of ſir William
 Craweford
 duryng þe tyme . þat þe forſaid Maneres landes tenement3 er in þer handes and for terme of here



lyve . at vsuell termes be even~ porcions fyfty marc3 eftyr þe purport of a graunt þer-of to here
made Jn-to wyttenes
of wh<ill><smudge, ?ilk></ill> thynges J ye . forsaide Edmond vnto þe parties of þis indenture .
tripartid hase sett to my seale These wyttenes . John@ of Etton@ Richard Pykeryng knyght3 laurens
Saxby Walter <ill><smudge, lalme: calverley></ill>
Thomas Willesthorp~ and odyr~ . Made þe . xiiij day of Maij Jn ye neynte yere of kyng henr~ þe
sext